

Venanzi Berther, Sedrun (1928–1990)



N.B. Cura che nus essan s'entupai da Daniev ell'ustria, ha negin sminau che nies bien amitg Venanzi Berther banduni nus schi spert. El era dacuort staus el spital pervia d'ina operaziun d'in maun, selegrava dalla buna reussida ed haveva tschaffen da saver s'engaschar puspei cumpleinamein en sia fatschenta da victualias Usego. Denton, cuort suenter Daniev sto el puspei serender el spital pervia d'ina fleivlezia dil cor. Suenter in temps da crisa era el sin buna via da migliurament – denton ad in'ulteriura attacca po el buca resister pli.

Sia mort anetga derasa gronda consternaziun, era el gie apprezius da ses vischins sco in bien carstgaun e negoziant cunscienzius.

Venanzi Berther ei naschius ils 3 da fevrer 1928 sco fegl da Valentin e Vica Berther-Huonder. El survegn il num tenor il drama «Venantius» da pader Maurus Carnot en versiun romontscha da Gion Cahannes. Quei teater, daus igl onn da sia naschientscha, ha giu gronda calamita a sias uras en Tujetsch.

Sco secund fargliun crescha Venanzi si el ravugl d'ina gronda famiglia. Ei era scart da lezzas uras ed ei veva num segidar. Venanzi va ad alp, denton leu se senta el dil tuttafatg sventireivels. El lai encrescher ordvart fetg per ses da casa e specialmein per sia mumma. Probabel eis el era buca vegnius libers da quella «malsogna» dils «Vigeli piners» – aschia vegnevan ils fargliuns da siu bab numnai – cura ch'el luvrava sco conductur tier la Viasier federala cun dimora a Lucerna. Perquei retuorna el 1962 beinbugen puspei a Sedrun ed arva leu cun sia consorta Victoria Cavagn da Danis la fatschenta Usego ella nova casa. Cheu en sia patria ed en in menaschi pign e familiar sesenta il Venanzi da casa. Ensemen cun sia consorta meina el la fatschenta ed el era apprezius muort sia curteseivladad e survetscheivladad. Grond tschaffen ha el da ses affons, als quals el era fetg attaschaus e per ils quals el haveva adina temps e peda.

En il ravugl familiar sesenteva il Venanzi il meglier. Perquei eis el buca s'interessaus pli bia per uffecis politics cun excepziun dil cussegli da scola, dil qual el ei staus commember e president. Quei vul denton buca dir ch'el era indifferents viers ils fatgs publics. El fuva bein informaus sur da quei che curreva e passava sin plaun local ed era pli vast – ed ei era interessant ed informativ da saver sediscuorer cun el sur da quellas caussas. Haveva el fatg ina gada siu meini, seschava el buca balluccar schi spert. El ha era buca temiu da tener petg all'opposiziun en funcziun publica.

Denton, pial d'elefant haveva il Venanzi buca. Siu sentiment fin e vulnerabel ha dau da sbatter ad el ed ha spossau sias forzas. Denton, entras sia sensibilitat haveva el era capientischa per ils autters, specialmein per tals che vegnevan tuccai da discletg e sventira. Cun plaid e cussegli ha el susteniu quels che han anflau confidanza en el.

Sper igl interess per ils fatgs publics s'interessava il Venanzi era per il cant. Bugen frequentava el in concert era ordeifer la Val. El ei era staus 25 onns commember dil Chor-baselgia da Sedrun ch'el ha presidiau 6 onns. Cun in cant edificont han ses anteriurs concatadurs priu comiau da lur camerat.

Ussa astga il Venanzi guder il cant etern. Quei seigi per nus – e specialmein per ses da casa – confiert e consolaziun.